

La SRG SSR spargna ulteriurs 40 milliuns francs

■ (cp) **Suenter in emprim program da spargn da 20 milliuns francs 2015 pervia da main entradas da reclama, spargna la SRG SSR a partir dal 2016 ulteriurs 40 milliuns.** Per las mesiras da spargn datti duas raschuns: la taglia sin la plivalur e la cumpart pli gronda da las entradas da taxas per ils emetturs regiunals. L'avrigl passà ha il tribunal federal decidì ch'ìls pajataxas na ston betg pajar la taglia sin la plivalur (uschia èn las taxas sa sbassadas da 462 sin 451 francs). En l'avegnir sto la SRG SSR pajar senza la taglia sin la plivalur. A questa conclusiun è la confederaziun vegnida. A la SRG SSR custa quai annual 35 milliuns francs.

La lescha da radio e televisiun (LRTV) revedida prevesa in augment da la cumpart per ils emetturs regiunals a las entradas da taxas da 4% sin 6%. Vers mez da l'onn 2016, cura che la lescha va en vigur, duain quels emetturs regiunals retschaiver svelt dapli daners. Quai ha il Departament federal per ambient, traffic, energia e communicaziun annunzià ultimamain.

Per consequenza vegn il budget da la SRG SSR ad esser 2016 ed ils proxims onns en media 40 milliuns francs pli bass che oz. SRF spargna ca. 12, RTS en la Svizra franzosa 8,5 e RSI en la Svizra taliana 5,5 milliuns. RTR en la Svizra rumantscha contribuescha radund 600 000 e Swissinfo 200 000 francs. La direc-

ziun generala a Berna spargna ensemen cun la Business Unit Sport 8,5 milliuns francs. Bun 4,5 milliuns vegnan spargnads tar projects naziunals e surregiunals.

Ina grupp da lavur, manada dal directur da finanzas da la SRG SSR *Beat Grossenbacher* – cun representants da tut las regiuns linguisticas – prepara las mesiras da spargn. Igl è da quintar cun ina reducziun tar il program e tar il persunal. «Las mesiras èn da realisar a moda transparenta, gista e consequenta», scriva il directur general *Roger de Weck* en ina brev a las collavuraturas ed als collavuratur. «A las sfidas finanzialas – sco er al temp da transformaziun da las medias – sto la SRG SSR far frunt.»



Radio e Televisiun Rumantscha contribuescha radund 600 000 a la runda da spargn da la SRG SSR che munta a 40 miliuns francs a partir da l'onn 2016.